

四庫全書

集部

欽定四庫全書

宋詩紀事卷三十八

錢塘厲鶚撰

毛友

友初名友龍字達可三衢人大觀元年進士政
和閒由翰林學士禮部尚書出守鄉郡有爛柯
集

寄顯之太尉使燕山

三年淮海靜妖氛
老上龍庭又勒勳
塞外爭看真太尉

行間猶識舊將軍
塵清漠北烽煙斷
風落山前號令聞
預想歸時如定遠
爭持白玉上青雲
合璧事類前集

盧襄

襄三衢人舊名天驥字駿元徽宗朝避天字改名襄字贊元大觀元年進士政和六年以朝散郎出為浙東提刑捕盜入剡靖康閒拜吏部侍郎推冊張邦昌建炎初安置衡州

庚溪詩話贊元詩篇極多向嘗得其數十首皆清拔可喜後因兵火失之尚記其贈鼓琴者曰

試將鍾子山水意一洗退之冰炭腸恨失其全篇

遊南巖山

不著烏紗只岸巾
尋山還得愛山人
半空飛雨侵衣潤
入座晴嵐照眼新
風過松杉猶蘊藉
雪消巖壑更精神
何時亦把任公釣
坐釣日東橫海鱗

剡溪

愁呵龜手冷搖鞭
乘興來登訪戴船
解事篙師小鳴櫓
恐驚寒雁入晴天

隱天閣

在嵯縣下鹿苑寺

欲結愛山人共了尋山債未有買山錢愁聞有山賣
小雨溼春風倦雲遮落日不若叫風來吹雲放山出
一眼吞萬山寸心貯千里何日上歸舟教人問春水
殘雪領春來疎鐘驚夢去尚憶去年愁孤舟繫江樹

瑞香花

入夢生香酒力微不須金鴨裊孤馥為嫌淡白非真色
故著仙家紫道衣

登玉虹亭

在下鹿苑寺

飢飈愁攫號窮冬層巒秀壁撐晴空閒拖老藤借餘力
來看霜巖飛怒虹小溪催呼老款段淪鼎篝火烹團龍
餘甘入口齒頰爽兩腋便欲生清風悠然千里隨眼界
金篦刮膜開雙瞳乃知足力不到處別有天地生壺中
國恩欲報已華髮征車未去先晨鐘玉川乘雲紫皇家
謫仙騎鯨河伯宮聊追二子歸禹穴碧空轉首山重重
遊定林寺

寒旌隱隱入花村
小雨初收水帶昏
不憚山城尋寺去
只將詩思與僧論
菱侵水步深藏艇
柳暗人家半掩門
莫厭禪居蕭冷甚
此來一為訪溪蓀

上鹿苑寺

鷲峯遊屐少我獨往多時僧護翻經石
猿攀嘯月枝地寒春到晚山遠夢歸遲
尚被浮雲誤吾心信是癡

以上
刺錄

途中書懷寄奉化知縣

自戴淵明漉酒巾
食鮭甘作庾郎貧
雖無殘菊簪華髮

賴有青山似故人，幾處鷗鳴牛背雨。
經年衣犯馬蹄塵，待攜神武朝衫去。
還我烟溪漱石身。
乾道四明圖經

春興

雪花初著鴛鴦瓦，疊嶂疎林入圖畫。
春工不作兩樣心，盡遣根荄赴陶冶。
我昔年少曾買春，著盡榆錢不多價。
春應索價來覓人，客氣今猶不相下。
待領春風歸去家，山卻有療愁花鄰公。
大段作春計，小園栽花今數世。
但憎赤腳婢惱人，要逐丫鬟同拾翠。
合璧事類前集

窗外梅花

已消殘雪豆稽灰斜壓疎籬一半開
雖我故園無分看問渠春色幾時來
冷香漸欲熏詩夢落蕊猶能韻砌臺
定復水邊多屐齒試令長鬣視蒼苔

瀛奎律髓詩見曾慥百家選

酴醿花九言

天將花王國豔殿春色酴醿洗妝素
頰相追陪絕勝濃英綴枝不韻李
堪友橫斜照水攬先梅瑤池董雙成浴

香肌露竹林嵇叔夜醉玉山頽風流何事不入錦囊句
清和天氣直挽青陽回

詩話補遺

桐君祠作招仙詞

桐君歸來兮仙馭遠遊將何之寧不欲朝玉京兮升紫
微戴日月之冠兮披紫霞之衣佩蒼精之龍兮餐玉田
之芝友王喬與蕭史兮儼霓旌玉佩而歲蕤何如歸來
援鶴慘兮怨空山澗壑寂兮松桂閒胡不拂袖烟幌兮
開雲闕藉芳草兮歌幽蘭庶乎遊山之人可以往還

招隱

有玉人兮山之隅騎蒼龍兮歌步虛薜荔衣兮女蘿裾
餐瓊藥兮披玉書朝玉皇兮遊上都擗麟脯兮邀麻姑
胡不捨此而來兮吾與俱

以上宋藝圃集

宇文虛中

虛中字叔通益州廣都人大觀二年進士建炎
初以資政殿學士充祈請使留金為翰林學士
紹興中謀劫金主事泄全家皆死淳熙初贈開

府儀同三司諡肅愍

在金日作三首

滿腹詩書漫古今頻年流落易傷心
南冠終日囚軍府北雁何時到上林
開口摧顏空抱朴脅肩奔走尚腰金
莫邪利劍今安在不斬姦邪恨最深

遙夜沈沈滿幙霜有時歸夢到家鄉
傳聞已築西河館自許能肥北海羊
回首兩朝俱草莽馳心萬里絕農桑
人生一死渾閒事裂背穿胸不汝忘

不堪垂老尚蹉跎有口無辭可奈何強食小兒猶解事
學妝嬌女最憐他故衾媿見霑秋雨短褐寧忘拆海波
倚杖循環如可待未愁來日苦無多

北窗炙輠云宇文虛中在金作三詩所謂人生
一死渾閒事云云豈李陵所謂欲一效范蠡曹
沫之事後虛中仕金為國師遂得其柄令南北
講和大母獲歸往往皆其力也近傳本年八月
中果欲行范蠡曹沫事欲挾淵聖以歸前五日
為人告變虛中覺有警急發兵直至金主帳下
金主幾不能脫遂為所擒嗚呼痛哉實紹興乙
丑也審如是始不負太學讀書耳

吳敏

敏字元中真州人大觀二年辟雍私試首選擢
浙東學事司幹官蔡京薦充館職欽宗即位知
樞密院事拜少宰謫涪州安置紹興初復為廣
西宣撫使卒

三朝北盟會編吳敏儀真人妙齡秀發政和初
上庠試書義有聲蔡京愛其丰韻粹美欲以女
妻之元中辭焉釋褐授浙東學事司幹官除館
職擢記注西掖時年二十七玉立駕鸞行中一
時歆豔敏有侍兒曰遠山美姿色通文理敏每
為文使供筆硯之役一日有訪敏者敏方據案
運筆達山者方磨墨拂紙時服其風流如此

題山光寺壁上墨竹

綠髮青衫舊竹君，墨卿揮拂更清新。
斷枝活葉風蕭瑟，想見凌雲百尺身。

聲畫集

句

醉中擲筆金鑾殿，睡起鳴笳鐵甕城。

贈王達可自翰苑出知鎮江耆舊

續聞

先生古人風，文字祖西漢。不令萬錢食，亦合五花判。

贈吳

正仲

苔溪渙隱叢話

李邦彥

邦彥字士美懷州人大觀二年釋褐第一宣和中累遷尚書左丞拜少宰靖康初特進太宰門下侍郎兼神霄宮使建炎初責潯州安置

三朝北盟會編邦彥性俊爽喜閭閻鄙猥事自號為李浪子每以市井鄙俚之語綴成小詞喧傳里巷邦彥嘗自言賞盡天下花踢盡天下毬作盡天下官都人亦呼之為浪子宰相

黃陵廟

蒼梧杳靄迷遐躅晚雲愁入修眉綠薰風不動五弦空

清血斑斑在山竹 長沙府志

劉才邵

才邵字美中廬陵人大觀二年上舍釋褐宣和
閒仕至尚書有樵溪居士集

紀夢

北風吹雲肅天宇蕙帳寒生月當戶頽然就枕睡思濃
夢魂悠悠迷處所仙君勝士宵見臨促席從容款陪語
自言本事清靈君學佛求仙兩無阻雲輶白日降瑤空

天衣飄飄袖輕舉方諸宮深雲海闊金碧禪房隔烟雨
與君初有香火緣聊復東來相勞苦方遊崑閬還無期
君住世閒須善為塵勞足厭何足厭等是實相夫何疑
前身似是塵外人端為世緣縻此身重聞妙語發深省
若更離塵佛亦塵方平羽節何時來道宮佛殿隨塵埃
未須苦說揚塵事東海波聲政似雷

獨醒雜志劉尚書美中嘗夜夢與一方士談禪
往復辨論宗乘中事甚詳因問之曰仙家亦談
佛耶方士曰仙佛雖二理豈有二哉美中既寤
頗異其事遂紀以詩詩中皆其閒問答之語

夜度娘歌

菱花炯炯垂鸞結
嬾學宮妝勻膩雪
風吹涼鬢影蕭蕭

一抹疎雲對斜月
詩話補遺

賈安宅

安宅字居仁
烏程人
收之從孫
大觀三年進士
第一累遷戶部侍郎
建炎初為給事中

茗溪

廣茗山下有深源
發此清流去不渾
直抵太湖三百里

滔滔分入海天門

湖州府志

王珩

珩字彥楚鄞人說之子大觀三年進士官宗正

少卿

夢中作

杖屨步斜暉烟村景物宜溪深水馬健霜重橘奴肥春
罷雞爭黍人行犬吠籬可憐田舍子理亂不曾知

西溪叢話

和潘良貴題明州三江亭韻

潘郎未覺鬢毛侵佳致乘閒得得尋古岸渺茫分遠渡
飛甍虛敞快人心融樽想見頻頽玉季諾由來雅勝金
野老固慚東閣客何妨同作醉翁吟

延祐四明志

倪濤

濤字巨濟永嘉人徙居廣德軍大觀三年進士
歷左司員外郎貶監朝城縣酒稅有玉谿集

偶訪吉甫畫三蠅壁閒吉甫有詩次韻

何人刻獼猴老眼覩荊棘不如丹青手快意風雨疾我

窮坐詩豪九鼎扛筆力偶然一點污著紙生羽翼千言
走蚍蜉寧為寸紙逼還當寫君詩什襲同藏畧

畫繼

次韻毛達可給事秋懷念歸

結茅遠人村破屋水半扉涼葉墮清響空山轉斜暉微
官臥江漢素心久依依十年天涯秋搖落幾芳菲馬蹄
歲月去夢蜨東南飛平生立壑志有言輒乖違不如孤
征鴻春風自知歸

宋文鑑

七夕

玉殿凭肩共語時
風清月墜有誰知
梧桐秋雨三山遠
始信生前有別離

錦繡萬花谷

章夏

夏字彥明寧國人大觀三年進士歷潭州通判
有湘潭集

夕陽洞

暖憑磴蘚坐蔭覓喬松倚一詣雲屋深猿鶴頗相喜
霜髯白紛紛謂我作黃綺

碧雲洞

寨裳踏寒流路險仰復偃崖根乳積雪石脈泉溜雨融

結知何年人閒閱今古

以上寧國府志

余安行

安行字勉仲德興人累舉不第以經學稱有石

月老人集

龍游舟中遇立冬

大觀戊子同應求至京口予赴試南京

挂帆朝發龍游浦天寒正下瀟瀟雨聞道人間今日冬

連檣處處歡相語我今與汝共孤舟寂寞舟中任水流
人生自適乃為樂莫把閒腸生寸愁

古今歲時雜詠

張正己

上元口號

繡車簫鼓動香街鐵鎖龜城度曉開仙鳳傳香留蜀國
夜龍銜燭上蓬萊月如流水隨天遠人似天桃出洞來
無限風光追不盡只驚信馬到瑤臺

古今歲時雜咏

白子儀

暑伏偶書呈端祖抑之

歲時三伏每相乘
雨汗居人困不勝
況是五弦均長養
何須六幕苦炎蒸
中乾願沃仙盤露
上賜堪加凌室冰
安得天風吹煩溽
釋然羣動返清澄

古今歲時雜詠

楊齊

寒食野外

寒食人家事
踏青偶驅羸馬出郊坰
禽聲喚雨嬌相詫
天色和春困不醒
芳草碧來絲作毯
好花紅處錦為屏

回頭畫角江城晚人倚鞦韆月半庭

古今歲時雜詠

孫覲

覲字仲益晉陵人大觀三年進士政和四年中

詞科高宗朝仕至戶部尚書提舉鴻慶宮有鴻

慶集

韻語陽秋東坡歸宜興道由無錫洛社嘗至孫仲益家時仲益年在髫髻坡曰孺子習何藝孫曰學屬對坡曰衡門稚子璫璣器孫應聲曰翰苑仙人錦繡腸坡撫其背曰真璫璣器也異日不凡

呂本中痛定錄前此上在青城齋宮無聊何桌

奏宜賦詩以遣興乃以孫覲汪藻應制上詩用
時字韻覲詩曰噬臍有愧平燕日嘗膽無忘在
莒時藻詩曰虜悵夢回驚日處都城心切望雲
時有以此達帥酋因撫此為名遂遲留車駕

楓橋三絕

白首重來一夢中
青山不改舊時容
烏啼月落橋邊寺
敲枕猶聞半夜鐘

翠木蒼藤一兩家
門依老柳抱溪斜
古城流水參差是
不見吳都舊日花

三年瘴海臥炎宵
夢隔青楓一水遙
萬里歸來悲故物

銅駝埋沒草齊腰

宜春臺

聞說宜春好層臺試一登隴泉悲瑟瑟松雪見層層孤
絕烟中寺微茫樹下僧詩工傳寫妙不數畫師能

棲霞洞

飛仙巢三山弱水環四溟誰知黃茅嶺自有白玉京獨
曳一枝筇梯空上青冥蟾飛墮八桂石隕化七星幽幽
炬火然異狀不可名垂天紫雲蓋挿地翠羽屏已無俗

士駕尚有遷客經敢言居夷陋妙絕冠平生

龍隱巖

跳波觸石喧古木抱崖擁老蛟厭泥蟠一笑作潭洞孤
峯起嵒萃哀壑浩呼洶腥風噤鼃淫凍雨落毛氄凜凜
白晝寒瘴髮立盡聳旱氣曛日黃縮爪但陰拱悠然四
大海歛此一毛孔安得化為霖蕙葉有光寵

以上鴻慶集

題洞庭山觀音院德雲堂

千丈銀山屹嵩華浪湧雲屯天一罇楊舟夜並鼃鼃窟

杖藜曉入雞豚社處處人家橘柚垂竹籬茅屋青黃亞
牛羊出沒怪石走蛟龍起伏蒼藤挂樓殿青紅隱半山
兩腋清風策高駕飢鼠窺燈佛帳寒華鯨吼粥僧跌下
世味久諳真嚼蠟老境得閒如噉蔗山靈知我欲歸耕
一夜築垣應繞舍

吳郡志

胡舜陟

舜陟字汝明自號三山老人績溪人大觀三年
進士高宗朝歷官徽猷閣待制廣西經畧使封

績溪伯忤秦檜死于獄有集

泛歛溪用老杜詩青惜峯巒過為韻

港淨千尋碧峯回兩岸青鷺飛煙漠漠猿嘯雨冥冥雞
犬聞聲地雲霞蔽隱局桃源疑此是時復問漁舸
溪山美有餘自古神仙宅窳室隱宣平題詩來李白至
今負薪人聞是餐霞客不向此尋真飄蓬端可惜

萬山回合處蔥鬱釣臺峯道義高千古簞瓢敵萬鍾羊
裘甘寂寞鳳闕肯從容勿謂狂奴態清風激懦庸

草木紛紛落江山正薄寒雲藏桐子宅波急沈郎灘回
首家林遠多愁革帶寬青楓知客恨塗血點林巒

觀山如走馬倏忽千尋過水從雲際來舟疑天上坐羈
旅援失羣往復蟻旋磨五韻寫中腸悲詞成楚些

苕溪漁隱叢話先君平日尤喜作詩手校老杜
集所正舛誤甚多句法暮年深得其意味

秉燭賞梅花

蠟烟青繞雪培堆神女疑乘香霧來綽約仙姿明醉眼
橫斜疎影入尊壘

題秋香亭

騷人足奇思香草比君子况此霜下傑清芬絕蘭茝氣
稟金行秀德備黃中美古來鶴髮翁餐英飲其水但恐
蓬藿傷課童加料理

茗溪漁隱叢話菊以黃為正此朱遜之之語東坡印可作詩贈之有識真似淵明之句余頃歲居泗上假館官舍小園中有一亭牆曰秋香環植以黃菊別無他物必好事者原東坡之意而作之也先君題詩云云附錄于此

句

舍挑紅紫鶯聲老宿麦青黃燕子飛
苔溪漁隱叢話

左 譽

譽字與言天台人大觀三年進士仕終湖州通

判

王照新志左與言天台名士也錢唐幕府樂籍
有名姝張穠者色藝妙天下君頗顧之如盈盈
秋水淡淡春山及惟雲剪水滴粉搓酥皆為穠
作當時都人有曉風殘月柳三變滴粉搓酥左
與言之對叙擾之後穠委身于立勲大將家易
姓章疏封大國紹興中覓官行闕暇日訪西湖
兩山閒忽逢車輿甚盛中覩一麗人褰簾顧君
而顰曰如今若把菱花照猶恐相逢是夢中視

之乃穠也君醒然悟入即拂衣東渡一意空門

洞霄宮

青山九鎖溪迴縈擎天一柱何崢嶸上同天目映寥廓
下開大滌通滄溟晉唐人物久寂寞天台石室蒼苔生
虛皇臺高步虛冷仙科玉音神所聽自憐學道二十年
此心久與青山盟竭來奉祠此山下媿無妙句如丹青
木公金母吾未識且待松根生茯苓

洞霄詩集

晏敦復

敦復字景初殊曾孫大觀三年進士高宗朝累
官權吏部尚書兼江淮等路經制使以寶文閣
學士出知衢州提舉亳州明道宮封臨淄侯卒

題梵隱院方丈梅

在定海縣

亞檻傾簷一古梅幾番有意喚春回吹香自許仙人下
照影還容高士來月射寒光侵磴戶風搖翠色鎖階苔
遊蜂野蜨休相顧本性由來不染埃

寧波府志

沈汝諧

汝諧杭州人大觀三年進士官金部

臨平山

山勢分明飲水駝孤峯西轉鬱嵯峨不須探問山童藥
且揖朝來爽氣多

咸淳臨安志

李彌遜

彌遜字似之連江人居吳縣大觀三年進士高
宗朝試中書舍人再試戶部侍郎以爭和議忤
秦檜乞歸田隱連江西山有筠溪集

樓大防序云公以力闢和議歸隱西山凡十六年不復有仕宦意詠詩自娛筆力愈偉

宿觀妙堂遇雨既度復回一日竟遊九曲而行賦

詩二首

堂在武夷山沖佑觀

人間何地寄衰翁
偶到神仙一葦中
可是仙居謝逋客
船頭無處避剛風

渡口回舟未忍移
淨坊聽雨坐題詩
餘齡儻有尋真路
試與披雲問鳳兒

朱子跋云觀妙堂東楹李公侍郎遺墨語意清婉字畫端勁至其下輒諷玩不能去然歲久剝

裂又適當供帳處後數十年當不復可讀矣別
為模刻授道士使陷眞壁閒庶幾來者得以想
見前輩風度李公諱某時以力抵和議出守臨
漳云慶元乙卯正月新安朱某謹奉書

次韻仲輔山中之作

崖陰坐清暝目為山光注妙意不可名悠然與心晤疎
泉石中鳴落葉衣上住冷風起虛籟還向無中去三生
聽鐘魚偶失來時步佛屋倚秋風團團兩桂樹卻疑此
境中曾是經行處

同天隱少章遊嵩山懷元明

秦公我輩士早踏翰墨場萬言若投石十年猶枯囊苦
欲泛江海有親在高堂牢落京華春門無一壺漿長鞭
策瘦馬送我古道傍憐我值險艱赤心寫摧傷鏗鏘五
字句勢與鵬鶚翔感此坐矯首星星鬢成蒼西風小搖
落雨洗烟嵐光嶂晚露孤秀野陰棲暗芳更攜鮑謝流
履盡千巖霜搜奇得幽深訪古到森茫月落潭影空清
吟殊未央緬懷紫芝宇百憂繞迴腸三歎已晡食十起
中夜牀雲埋長安日魂夢不敢驤茂苑富山水結廬余

所嘗我欲放船下卜鄰俯滄浪耦耕種秫田共掃三徑
荒頭白青山裏長歌樂歲觴

題趙幹江行初雪圖

瓜步西頭水拍天白鷗波上寄長年箇中認得江南手
十里黃蘆雪打船

自大寧泛舟還涇川

岸梢濃染一溪青山影歸舟落葉輕欲學漁郎颺綸手
雨蓑月笛了平生

以上筠溪集

李元亮

元亮字光祿建昌人山房公擇尚書族子大觀
中以牋啟為蔡薺所賞登貢士科

句

人閒知晝永花落見春深
朝雨未休還暮雨臘寒纔
過又春寒

容齋三筆

趙企

企字循道大觀閒宰績溪重和初台州倅

高齋詩話趙企循道以長短句得名所為詩亦
工恨不多見嘗記其警句云愁從竹葉杯中去
老向菱花鏡裏來幾夜已生蝴蝶夢三生辜負
鷓鴣斑青銅不覽一兩日白髮已添三四莖
苕溪漁隱叢話循道宰予桑梓之邦因此傳錄
得循道詩多大率體格全學白樂天故句語皆
平易如青燈影冷碁三戰紅火爐溫酒一杯千
山來不斷一水去無窮餘不及此者亦多

顯孝南山寺

背日西來眼界明
隔溪遙見梵王城
旌旗夾道蔽山影
笳鼓入林聞谷聲
青鳥向人疑有意
白雲迎客亦多情
夕陽臨水共歸去
明日紛紛塵事生

赤城志

汎舟晚出北關

舟汎官塘靜人歸一葉閒影疎行處柳青遠望中山道
在身從老詩窮意覺閒到家秋歛足有謂掩柴關

秋日汎西湖

湖光山色共爭秋一點塵埃無覓處沈沈水底見青天
畫舸直疑天上去

以上咸淳臨安志

王震

震開封人定國之姪大觀閒知蔡州

雪

未送餘寒歸嶰谷先傳春信到花叢
侵凌竹色回新綠

點注梅梢破小紅

後村千家詩

鄭滋

滋大觀中臨晉縣主簿

遊王官谷

大廈將顛仆一木安能支
唐室既頽齧有才何所施
表聖隱王官出處適其宜
藩鎮方跋扈擁兵相雄雌
尾大

不可掉網紀日凌夷雖云務始息要求無定期當此誰
為援欲進速禍基優遊向泉石琴酒聊自資休休復莫
莫終永忘所規著史以見志迂闊從人嗤風馭去不返
幽谷空遺祠名與前峯高挺挺為表儀潔與飛瀑並濁
流應忸怩方今重完節褒封來非遲發揚在守土抗章
無媿辭庶幾慰精爽光輝于盛時

大觀初家府君簿臨
晉嘗留詩于祠堂意

以表聖之高名清節暴白于世而風采為可仰也謹摹
諸石庶永來觀政和戊戌八月望男從事郎虞鄉縣令

師甫題 王官谷集

莫儔

儔字壽朋湖州人政和二年進士第一靖康初
為翰林學士使金留仕偽楚建炎初竄全州

遊破山興福寺

久聞勝地有蓮宮乘興來遊仗瘦筇庭老樛枝翠瓔珞
池生並蒂玉芙蓉飛仙何意來題柱開澗當年想鬪龍
歸騎迴看樓閣處雲深隱隱度疎鐘

蘇州府志

譚知柔

知柔字勝仲金壇人政和二年進士通判邵州
終祕書少監有華陽居士集

晚醉口占

晚醉扶筇過竹村數家殘雪擁籬根風前有恨梅千點
沙上無人月一痕

茗溪漁隱叢話此即吳可晚春詩易其題改詩
中三四字而已

絕句

漫言無處覓歸田江北江南水拍天抖擻十年塵土夢

秋風吹上釣魚船

同上

初夏

麥隴風來翠浪浮，霏微小雨似深秋。
野亭終日卷簾坐，清樾對啼黃栗留。

事文類聚前集

趙野

野開封人，政和二年進士，歷中書舍人、翰林學士、拜尚書左丞。靖康初，為門下侍郎，責邵州安。置建炎初，復起知密州，盜賊充斥，野棄城去，軍。

校杜彥作亂追歸殺之

句

複道密通繁衍宅諸王誰似鄆王賢

宣和春帖子
波雜志

清

辛次膺

次膺字起季萊州人政和二年進士南渡寓家

浮梁孝宗朝累官同知樞密院事資政殿學士

提舉洞霄宮

題使宅眉壽堂

多病相如欲倦遊四年紆綬到三州
君恩乞與歸巖壑
何啻將軍得罷休

淳熙三山志

翁彥約

彥約字行簡崇安人政和二年進士累遷太常博士提舉河北西路學事除知高郵軍

毛竹洞

毛竹連雲路欲迷洞門深鎖落花遲
曾孫幾度春風老

未了仙人一局碁

建寧府志

羅汝楫

汝楫字彥濟歙縣人政和二年進士高宗朝仕
至吏部尚書龍圖閣學士封新安郡開國侯卒
贈少師有東山藁

謁蘓仙祠

絳節回白馬青書收赤龍仙人在何許烟霞鎖晴峯荒
祠冠其嶺千古凜靈蹤粉堵塵網懸石凹苔錢重我來
款遺像再拜虔且恭檀烟洩雲白茗粥浮新濃世事非

所期真遊誓相從雲輶幾時來微風韻寒松

郴州文志

李綱

綱字伯紀邵武人政和二年進士靖康初歷尚書右丞高宗即位累官尚書左僕射兼門下侍郎落職鄂州居住紹興中除觀文殿學士湖廣宣撫使知潭州卒贈少師孝宗朝賜諡忠定有

梁溪集

張南仲置酒心淵堂值雨

自別西湖日置懷卻因謫宦得重來雲深不見孤山寺
風急難乘搖碧齋未放幽情窮水石且將離恨汎樽罍
勝遊須徧山南北何日晴天為一開

登鍾山謁寶公塔

寶公真至人鳥爪金色身杖攜刀尺拂語隱齊梁陳我
登鍾山頂白塔高嶙峋再拜禮雙足聊結香火因

恭被詔書褒贈陳公少陽忠義痛感有作

哀痛綸音灑帝章賜金贈秩喜非常無心聖主如天地

著意奸臣極虎狼忠血他年應化碧英魂今日已生光
先生憤懣誠昭雪九死南遷豈自傷

平昔初無半面交危言幾辨蓋寬饒幽冥我已慚良友
忠憤誰能念本朝故國遙看雲杳杳新阡何處草蕭蕭
撫孤未遂山濤志誰繼離騷賦大招

晞真館詩

并序

余今夏夢乘舟亂石間四顧峯巒竒秀如玉色者
覺頗異之及謫官劔浦道武夷山小舟泝流水落石

出徧覽勝槩至晞真館雪作巖石皆白恍如舊遊然
後信出處之分定而斯遊之清絕已先兆于夢寐雖
欲不到不可得也作小詩以紀其事

清夢先曾到武夷玉峯積雪倍幽奇小舟遊罷尋歸路
恰似翛然夢覺時

奉寄呂丞相元直

出擁琬戈入袞衣江城重詠我公歸手扶日月還黃道
足履星辰上紫微已集羣英熙帝載好施長策復邦畿

海濱病叟無他望側耳天聲暢國威

以上梁溪集

李正民

正民字方叔揚州人定之孫政和二年進士高
宗朝歷官中書舍人徽猷閣待制流寓海鹽

海月亭

新亭注目了無邊脫屣塵寰思杳然萬頃秋濤翻浩淼
一輪明月對虛圓先生雲漢疑無地望斷蓬萊別有天
赤水棗花君莫問新詩賡唱似朱弦

嘉興府志

胡松年

松年字茂老海州懷仁人政和二年上舍釋褐累遷中書舍人高宗朝拜吏部尚書權參知政事提舉洞霄宮

題觀音院德雲堂

并序

余罷自平江謀居霅川過洞庭西山暫寓觀音院德雲堂坐揖湖山勝槩亦足以少洗簿書役矣數年兵火之禍何所不至獨此地清涼安穩豈非林屋洞天

金庭玉柱為神仙窟宅有物常護持耶余願挂冠終
老此閒也

小舟乘風飛鳥過萬頃雲濤縱掀簸此行要是快平生
無數青山笑迎我山根隱約見人家槿籬茅屋埋烟霞
宛似秦人種桃處川原遠近紛香葩杖藜逕踏華山去
試問蓮開今何許路迷絕壑蔭松筠身到半山聽魚鼓
道人為我開雲堂是中境界渾清涼幽磬時和野鳥語
飛泉暗瀉巖花香文書照眼本吾事雁鷺著行敗人意

造物似憐塵世囂
挈置湖山煩一洗
何人夜呼隱去來
向來得喪真山崖
金庭玉柱永不改
人閒劫火空飛灰
吳郡志

汪思溫

思溫字汝直
鄞人
政和二年以太學上舍中乙
科
歷官知臨安府
直顯謨閣
以壽終

和潘良貴題明州三江亭韻

危亭聳觀與雲侵
勝槩何勞杖履尋
回合江山真有意

去來鷗鷺本無心歡聲洋溢均千里好句清新抵萬金
四海正須經濟手豈容長對白頭吟

延祐四明志

楊景

政和二年三月廿四日廊延帥府大閱即席呈獻

帥座賈公凱歌

十首存三

旌旗風暖颺春暉的皪寒光照鐵衣壯士銜枚聽傳令
邊鴻敢傍陣雲飛

奏罷清笳聽凱歌行營細柳拂彫戈征人盡道從軍樂

城上黃雲喜氣多

天兵十萬擁貔貅紫塞年年大有秋不是頡堯求款附

為君唾手取靈州

吳禮部詩話

陳公輔

公輔字國佐臨海人政和三年上舍及第高宗

朝官至禮部侍郎出知處州轉徽猷閣待制提

舉江州太平觀

李伯紀丞相挽詩

豪傑不世出為時斯閒生有心安社稷無計避功名憂
國唯知重謀身祇覺輕徒令青史上永永著英聲

梁溪集附

廣慈院

來時膏雨迷新野去日薰風吹舊林寄語主人休惜別

白雲南北本無心

台州府志

陳與義

與義字去非洛人一云汝州葉縣人登政和三年
上舍甲科紹興中歷中書舍人拜翰林學士知

制誥尋參知政事提舉洞霄宮有簡齋集

苔溪漁隱叢話陳去非詩平淡有工如疎疎一
簾雨淡淡滿枝花官裏簿書何日了樓頭風雨
見秋來客子光陰詩卷裏杏花消息雨聲中
鶴林玉露自陳黃之後詩人無逾陳簡齋其詩
繇簡古而發穠纖遭值靖康之亂崎嶇流落感
時恨別頗有一飯不忘君之意如涼風又落南
宮木老雁孤鳴漢北州乾坤萬事集雙鬢臣子
一謫今五年天翻地覆傷春色齒豁頭童祝聖
時近得會稽消息不稍傳荆渚路岐寬東南鬼
火成何事終藉胡銓作諍臣龍沙此日西風冷
誰折黃花壽兩宮皆可味也
劉後村詩話元祐後詩人迭起一種則波瀾富
而句律疎一種則煅煉精而情性遠要之不出
蘇黃二體而已及簡齋出始以老杜為師墨梅

之類尚是少作建炎以後避地湖嶠行路萬里
詩益奇壯元日云後飲屠蘇驚已老長乘舴艋
竟安歸除夕云多事鬢毛隨節換盡情燈火向
人明岳陽樓云登臨吳蜀橫分地徙倚湖山欲
暮時又云乾坤萬事集雙鬢臣子一謫今五年
聞德音云自古安危關政事隨時憂喜到樵漁
五言云泊舟華容縣湖水終夜明凄然不能寐
左右菰蒲聲窮途事多違勝處心亦驚三更螢
火鬧萬里天河橫腐儒憂平世况復值甲兵終
焉無寸策白髮滿頭生造次不忘憂愛以簡嚴
掃繁縟以雄渾代尖巧第其品格當在諸家之
上

題唐希雅畫寒江圖

江頭雲黃天醞雪樹枝慘慘凍欲折耐寒野鴨不知歸

猶向沙邊弄羽衣黃茅終日不自力影亂弱藻相因依
唯有蒼石如卧虎不受陰晴與寒暑舟中過客莫敢侮
閒伴長江了今古

為陳介然題持約畫

層層水落白灘生萬里征鴻小作程日暮微風過荷葉
陂南陂北聽秋聲

夏日偕五同舍集葆真宮池上避暑取綠陰生畫
靜分韻賦詩得靜字

清池不受暑幽討起予病長安車轍邊有此萬荷柄是
身唯可嬾共寄無盡興魚遊水底涼鳥語林閒靜談餘
日亭午樹影一時正清風不負客意重金贈聊將兩
鬢蓬起照千丈鏡微波喜搖人小立待其定梁王今何
許柳色幾衰盛人生行樂耳詩律已其賸邂逅一尊酒
他年五君詠重期踏月來夜半嘯烟艇

容齋四筆自崇寧以來時相不許士大夫讀史
作詩何清源至于修入令式政和後稍復為之
而陳去非遂以墨梅絕句擢真館閣其葆真避
暑詩詩成出示坐上皆說為擅場朱新仲時親

見之云京師無人不傳寫也

墨梅

粲粲江南萬玉妃
別來幾度見春歸
相逢京洛渾依舊
唯恨緇塵染素衣

含章簷下春風面
造化功成秋兔毫
意足不求顏色似
前身相馬九方臯

茗溪漁隱叢話徽廟召對稱賞此句自此知名
仕宦寢顯

秋夜

中庭淡月照三更白露澄空河漢明
莫遣西風吹葉落
只愁無處著秋聲

以上簡齋集

山居

耿耿虛堂一榻秋
人閒高枕幾王侯
亂雲未放曉山出
片月不隨溪水流
檢校一身渾是嬾
平章千古得無愁
湘波見說清人骨
恨不移家阿那州

雨過

水堂長日靜鷗沙
便覺京塵隔鬢華
夢裏不知涼是雨

捲簾微溼在荷花

長干行

妾家長千里春慵晏未起花香襲夢回畧畧事梳洗妝
臺罷闕鏡盛色照江水郎帆十幅輕渾不聞櫓聲曲岸
轉掀篷一見兮目成羞聞媒致辭心許郎深情一床兩
年少相看悔不早酒懽娛藏闔園嬉索鬪草含笑盟春
風同心以偕老郎行有程期郎知妾未知鷁首生羽翼
蛾眉無光輝寄來紙上字不盡心中事問徧相逢人不

如自見真心苦淚更苦滴爛閨中土寄語里中兒莫作
商人婦

九日家中

風雨吳江冷雲天故國賒扶頭呼白酒揩眼認黃花客
夢蜚聲歇邊心雁字斜明年又何處高樹莫啼鴉

以上

珊瑚網

李乘

乘字德載政和中崑山令

題慧聚寺次孟郊張祐韻

千山貯雲房瓶鉢安空牀野籟有真響天葩無世香巢
鶴羽翎老睡僧眉宇光此外足憂喜勞勞榮辱場

一寺皆樓殿雖雄向此吞雲霞終日影檜柏幾年根檻
俯水烟國磬傳雞犬村倚窗翻貝葉宴寂屬空門

崑山雜詠

洪興祖

興祖字慶善丹陽人登政和上舍第高宗朝召
試授祕書省正字歷官提點江東刑獄知真州

饒州秦檜當國以怨望編管昭州卒

宋史儒林傳興祖徙知饒州初夢持六刀覺曰
三刀為益今倍之其饒乎已而果然

拂雲亭

在真州東園

黃雲收盡綠針齊江北江南水拍提野老扶攜相告語

兒童今始識鋤犁

儀真縣志

謝彥

彥字子美官稱宣句龍圖

留題驪山

自媿塵容去復來驪山頂上看崔嵬誰人得向長安道
曾浴蓮湯十二回

政和丙申三月十八日

驪山刻石

黃伯思

伯思字長睿自號雲林子邵武人履孫大觀中
官祕書省祕書郎政和中卒有東觀餘論

題河南王氏所藏子敬帖

君家大令書盈紙筆勢翩翩趣多媚雖云杳拖如少年
豈至拘攣同餓隸會稽七子五知名此公風槩尤超詣

太極璇題猶重書

謂不書太極殿榜

一時凜凜標英氣半袖精

械衆爭求數幅新
希世猶貴當時親
遇得已難況復傳
今僅千歲龍珠歸
浦劒還津
此帖君藏真得地才披尺
許目增明鸞跂鴻驚欲飛逝
硬黃響搨若傳吾完碧摹
刊願垂世

東觀餘論


杜子民

望瀛亭

擁傳來觀海危亭一振衣
雲晴千怪出浸大百川歸日

月遭吞吐乾坤入範圍羣鷗不須避禪寂久忘機蓬萊

閣詩集



宋詩紀事卷三十八

欽定四庫全書

集部

宋詩紀事卷三十九

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣鮑之鍾

謄錄監生臣錢萬卷

欽定四庫全書

宋詩紀事卷三十九

錢塘厲鶚撰

姚孝錫

孝錫字仲純豐縣人政和四年登第調代州兵

曹有雞肋集

齊東野語金人寇雁門州將恇怯議降孝錫竟
投牀大軒不與其議既得脫去遂往五臺簿移
疾不仕因家焉治生積粟至數萬石遇饑歲盡
出以賑貧之所居正據五臺之勝亭榭數十座
花竹百畝中歲盡以家事付諸子日與賓朋放
浪山水詩酒間自號醉軒

題滕茂實祠

本期蘓鄭共揚鑣不意芝蘭失後凋遺老祇今猶涕淚
後生無復識風標西陲雁度霜前塞潯水樵爭日暮橋
追想平生英偉魄凌雲一笑豈能招

齊東野語

睡起

生涯甘分寄耕桑山色圍門水遶牆困病久懲耽酒癖
愛閒猶有和詩忙簷冰滴砌春猶冷野馬浮川日漸長
舊事老年多記憶故園歸夢正悠揚

次韻王無競見寄

客懷重倚仲宣樓
白草黃雲塞上秋
山色不隨塵世改
水聲還抱故城流
隙中畏景那堪玩
鏡裏衰顏祇自羞
多媿詩人苦相憶
遠傳佳句弔清愁

次韻秋興

老畏年光速
愁添旅夢多
西風著梧竹
歸思入烟波
夜永憑詩遣
顏衰得酒和
故溪千樹柳
誰復曬漁蓑

題柳溪別墅

雨霽風和不動塵
柳邊攜酒賞青春
頻來溪鳥渾相識
渡水穿花不避人

次李平子登臺有感韻

落日孤雲帶遠岡
戍樓烟瘴舊邊場
疲民卒歲方懷土
遠客憑高自憶鄉
漢使一朝延四皓
秦詩千古弔三良
行藏此意無人解
聊借青山送酒觴

以上中州集

句

岸漲魚吹沫
山空石轉雷
谷虛生地籟
境寂散天香

節物後先南北異人情冷暖古今同
久客交情諳冷暖衰年病骨識陰晴
元晏暮年常抱病子山終日

苦思歸

食貧豈復甘秦炙客病空懷奏楚音

以上齊東野語

張綱

綱字彥正丹陽人政和四年上舍釋褐第一高

宗朝累官權吏部尚書參知政事以資政殿學

士知婺州致仕卒謚文定改賜章簡有華陽集

聞官軍掩殺城中羣寇次傳道韻

未復錢唐郡先收鐵甕城妖星隨月落殺氣逐參橫已
築鯨鯢觀重新鼓角聲大江應好在流恨幾時平

寄宿隱靜東軒軒外竹引飛泉落池中隔窗聞之
如秋雨瀉簷聲

踏殘西日寄僧房一炷爐熏秋夜長誰作響泉喧客枕
夢回敲聽雨淋浪

老夫辭榮里居行年八十酒閒漫成拙句述意而
已不以示外也

莫笑樽前白髮翁，曾騎竹馬戲元豐。
年彌八秩癡頑在，身荷三朝寵眷隆。
綠野敢將前哲比，香山幸有老人同。
興來尚欲尋幽去，收拾殘春杖履中。

以上華陽集

朱粹

粹政和中豐城令

題梅仙觀

書投北闕言無用，吏隱南昌寄此閒。
身陟九霄歸紫府，名垂千古寄青山。
夜壇星斗誰瞻仰，曉殿雲烟自往還。

幾疊高峯人罕到分明眞境異塵寰

梅仙事實

胡景裕

景裕字好問湘潭進士

饒范子

范公稱之父

當年邂逅帝王畿歲月侵尋若電飛學士榮除青瑣闥
故人老著白麻衣尊前且鬪閒身健眼底休論往事非
第恐鋒車促嚴召片帆明發不輕違

范公稱過庭錄

何 梟

臬字文縝仙井監人政和五年進士第一歷官
尚書右僕射兼中書侍郎死靖康之難建炎初
贈觀文殿大學士

上庠錄政和丙申殿試何臬為狀元潘良貴次
之皆年少有丰貌而第三郭孝友頗古怪唱名
日呵出御街觀者皆曰狀元真何郎榜眼真潘
郎第三人真郭郎也
曰璐按政和五年丙申應作乙未

在金營題詩

念念通前劫依依返舊魂人生會有死遺恨滿乾坤

三朝

北盟會編

潘良貴

良貴字子賤一字義榮金華人政和初上舍釋
褐建炎初為左司諫紹興中除中書舍人出知
明州提舉明道宮歸李光得罪以通書坐降三
官卒有默成居士集

夜坐聞竹聲示姪

室明窗有燈夜暗天無月趺坐依蒲團竹聲助清絕初

疑小雨至蕭蕭俄復歇忽然變軒昂風湍散巖穴聽久
耳根靜萬慮皆瑩徹塵凡不待掃境妙心自潔奇哉不
二門欲倩維摩說

雪中偶成

飛花看六出俄向臘中來解驗人情喜始知天意回夜
闌窗愈白曉凍日難開麥熟何時節飢民正可哀

贈方仁聲

學道悠悠未見功敢云凡質有仙風他年一鉢江湖去

先向苕溪訪葛洪 以上默成居士集

陳光祿挽詩

強敵登城日中華將士奔人皆趨北闕君獨死南門
計無人用英聲有史存秋原悲淚落桂酒與招魂

庚溪詩話先君光祿靖康間為京城守禦司屬
官嘗以守禦策獻于朝議者沮之京城失守督
將士與虜戰遂以身殉國潘待制子賤為挽詩
云云吳師道敬鄉錄陳巖肖子象金華人父德
固死靖康之難子象以任子中詞科仕至兵部
侍郎著庚溪詩話

題三江亭 守明州日作

假守衰顏病日侵湖山雖好倦追尋登城忽覩三江水
快我平生萬里心聊築小亭怡父老敢承佳句粲珠金
春濤正待諸君賞更拂詩牌看醉吟

延祐四明志

沈與求

與求字必先德清人政和五年進士高宗朝累
官吏部尚書翰林學士兼侍讀除參知政事知
樞密院卒贈左銀青光祿大夫謚忠敏有龜溪
集

錢唐賦水母

疾風吹雨回江城，
鰲牙嘔呀潮欲平。
客居喜無人事撓，
相與環坐臨前楹。
眼中水怪狀莫名，
出沒沙觜如浮嬰。
復如緇笠絕兩纓，
渾沌七竅俱未形。
塊然背負羣蝦行，
嗟其巧以怪自呈。
疑目僂視相將迎，
老漁旁睨笑發聲。
曰：此水母官何驚！
江流如奔絕滄瀛。
潮汐往來月為程，
藏納衆污無滿盈。
浮埃塵滓溷九清，
結成此物宜昏盲。
使蝦導迷作雙睛，
乃能接引蚌與蛭。
亦猶巨蛭二體併。

離則無目為光精江天八月霜葉鳴罽師得蝦供水征
水母棄擲羅縱橫試令收拾輸庖丁絳磬收涎體紆紫
飛刀縷切武火烹花磁飮餽粲白英不殊冰盤堆水晶
稻醺齏寒芼香橙入齒已復能解醒遣漁止矣忽復評
嗟哉此性愚不更定矜故態招三彭且摩枵腹甘藜藿

秋日閒居

茅屋秋風斗破除蕭騷渾似浣溪居青山侍坐從吾好
黃帽籠頭與俗殊賴有園官能送菜可無溪友解畱魚

從今輒莫慚
朽腹一飽須煩插架書

以上龜溪集

夜書山驛

天寒夜向闌
月出山更靜
風露搖青空
萬象光耿耿
啼

蛩泣幽草
賓鴻度前嶺
歸來坐孤窗
松竹舞清影

前賢

小集拾遺

臞菴 為王文孺作

地控三州界
池開十丈蓮
桑麻無杜曲
松菊有斜川
別

浦歸帆遠
他山晚照妍
江湖春水闊
客與白鷗前

吳郡志

洪皓

皓字光弼鄱陽人政和五年進士建炎三年假
禮部尚書使金不屈被留十五年始還除徽猷
閣直學士尋謫英州徙袁州卒復官謚忠宣有
鄱陽集

名臣言行續錄永祐陵崩于五國城公即燕山
開泰寺為文以薦曰千歲厭世莫遂乘雲之仙
四海遏音同深喪考之戚況故宮為禾黍改館
徒饋于秦牢新廟游衣冠招魂但歌于楚些雖
置河東之賦莫止江南之哀遺民失望而痛心
孤臣久繫唯歐血伏願盛德之祀傳百世以彌

涕 昌在天之靈繼三后而不朽故臣讀之無不流

石碯大義滅親

惡吁及厚篤忠純大義無私遂滅親後代姦邪殘骨肉

屢援斯語陷良臣

賔退錄

劉無極

無極字晞顏丹徒人政和五年進士終尚書郎

漾花池

一池春水綠如苔水上新紅取次開閒倚東風看魚樂

動搖花片卻驚猜

墨莊漫錄

秦檜

檜字會之江寧人政和五年進士中詞科靖康
中除御史中丞從二帝北遷高宗建炎初達蘭
縱使來歸拜禮部尚書紹興中拜右僕射同中
書門下平章事累加太師益國公死贈申王諡
忠獻開禧初追奪王爵改諡繆醜

賓退錄紹興閒禁中呼秦太師為太平翁翁見
放翁詩注

題范文正公書伯夷頌後

高賢邈已遠凜凜生氣存韓范不時有此心誰與論

鐵網珊瑚長樂郭陸跋云片紙三百年承平碩輔姓字皦皦如日月見之束衽盤辟若檜若似道亦蟲其間使人指畫唾罵然則士不以夷齊自淑其不為文正公罪人者幾希

葉廷珪

廷珪字嗣忠崇安人政和五年進士知德興縣中興召為太常寺丞與秦檜不合出知泉州篤學淳雅名重當時葉顥陳俊卿黃祖舜鄭丙皆

出其門有海錄碎事

末利

露華洗出通身白
沈水熏成換骨香
近說根苗移上苑
休慚系出本南荒

全芳備祖

翁采

采字景文崇安人政和五年進士調歸州教授
貽里中舊遊

偶控星槎到日邊
幾回歸夢入閩川
鄉關阻絕三千里

江海馳驅四十年白髮應憎梅共放青衫漫與草爭鮮
相逢準約春風裏黎嶺雲深叫杜鵑

崇安縣志

郭印

印成都人政和中進士

遊大隋山

我聞大隋名夢寐猶記錄得檄天彭道喜氣和可掬出
城六十里崎嶇轉江曲山門忽斗上危步依筇竹崩石
帶烟雲異草羅澗谷寂鳥下窺人累援時挂木路窮纔

見寺金碧煥雙目祖師古定光燈冷無人續開公生異
世大事如付囑僧言山長陰朝暮雲容感茲辰為我晴
疊岫堆濃綠虛閣倚秋風一洗塵土俗舉手揖丹景橫
身跨白鹿十年勞問訊親到心始足坐久燭漸微借榻
雲間宿山寒寐不成窗外泉鳴玉

全蜀藝文志

下巖寺

雲安欣及境小刹為徘徊殿閣隨巖轉軒窗向水開僧
雖持鉢去客自艤舟來欲往無畱計幽懷亦暢哉

四川總志

傅崧卿

崧卿字子駿山陰人墨卿從父弟政和五年進士高宗朝累官中書舍人給事中卒有樵風溪堂集

題趙宗萬跛鼈傳後

鶴書東召竟牢辭一去騎鯨世莫追會有丹青遺像在誰將配食李真祠

會稽續志趙宗萬字仲困山陰人築室郡之照水坊畜一鶴號丹砂引以為侶祥符中詔舉遺

逸郡守以宗萬薦尋被召乃曰吾老矣不足任
事獻跛鼈傳以自見朝廷賜以羽服崧卿為賦
詩云云

王珉

珉字中玉大名人懿敏公素之後政和五年上
舍出身紹興閒歷臺諫從官寓家三衢

還靖師草屨

跣足山行踐綠蕪道人應念我崎嶇還將達磨西歸屨
暫作王喬羽化鳬為愛輕鬆宜踏石更憐瀟灑勝聯珠

還君舊物君收取認得拖泥帶水無

前賢小集拾遺

何大圭

大圭字晉之廣德人政和八年嘉王榜進士仕
為祕書省著作郎

偶然作

茅屋松窗小隱家茶煙漠漠水斜斜
簷間乳燕未成語
庭下石榴爭放花
賴有詩書銷白日
倦隨車馬走黃沙
林泉舊約好徑去
風雨滿江垂釣車

庚溪詩話

薛朋龜

朋龜字彥益鄞人政和八年進士官權工部郎
知興國軍奉祠與汪思溫輩結社林下稱四明
五老

和潘良貴題明州三江亭韻

爽氣寒光四壁侵青山千仞水千尋遠觀吾里瀛洲路
悵望誰人魏闕心春到已多鳴玉佩酒酣應有解貂金
紫微太守經營巧消得時賢次第吟

延祐四明志

鄭 穀

穀字致剛建安人政和八年進士授安陸府教授高宗即位擢監察御史拜御史中丞累遷端明殿學士同簽書樞密院事卒諡忠穆

杜鵑詩

杜鵑飛飛無定棲寄巢生子百鳥依園林花老晝夜啼
安得百鳥挾以歸

建炎復辟記建炎已酉苗劉之變端明殿學士同簽書樞密事鄭穀奏苗傅劉正彥等悖逆肆

虐擅行殺戮朝廷近日差除多出二人之意兼
聞以簽書樞密院召呂頤浩以禮部尚書召張
浚又分張浚之兵以五百人歸陝及浚不受命
俊不肯分所部兵遂謫浚以散官居柳州擢俊
以節度知鳳翔皆出傅等姦謀使外無強兵謀
臣內生變亂事不可緩遂一章乞留呂頤浩知
金陵一章言張浚不當謫而求有膽氣謹密可
共事之人得奉議郎謝嚮令為客旅徒步如平
江見張浚等具言城中之事令嚴兵備大張聲
勢持重緩進使其自遁無致城中之變驚動三
宮撰杜鵑詩四句親寫令攜去執呈諸人以為
信驗

梅磻詩話建炎間苗傅劉正彥作亂是時中丞
鄭穀密遣謝嚮如平江仍作詩示呂元直張德
遠二公呂張得詩即起兵成復辟功詩不徒作
也

張浚

浚字德遠綿竹人政和八年進士高宗朝拜右
僕射中書門下平章事兼都督諸路軍馬孝宗
即位封魏國公除樞密使卒贈太師諡忠獻

李伯紀丞相挽詩

蒼蒼安可料舊德奄重泉痛為黎民惜誰扶大厦顛英
風摩日月正氣返山川丙午功勲在豐碑萬口傳

梁溪集附

朝陽巖

已覺雲天闊風聲四面涼路幽遲晚日巖古挹流香客
舍長年靜漁舟底事忙相逢賢太守不用管弦將

零陵志

郭奕

奕川陝宣撫司幹辦公事

嘲張宣撫

秦山未盡蜀山來日照關門兩扇開刺史莫嫌迎候遠
相公新送陝西回

三朝北盟會編建炎四年九月張浚以陝西五
路軍軍于富平為婁室所襲不戰而潰宣撫幹

官郭奕為詩曰婁室大王傳語張老謝得送到
糧草斛秤不畱一件怎生見得多少及退軍入
散關過漫天坡又有詩云云後奕罷官住晉州
賣蒸餅為生晏如也

王庭珪

庭珪字民瞻安福人政和八年進士紹興中胡
銓上疏乞斬檜謫新州庭珪獨以詩送行坐訕
謗流夜郎檜死許自便孝宗召對內殿除直敷
文閣有盧溪集

題宣和御畫

玉鎖宮扉三十六誰識連昌滿宮竹內苑寒梅欲放春
龍池水暖鴛鴦浴宣和殿後新雨晴兩鵲飛來東向鳴
當時妙手貌不成君王筆下春風生長安老人眼曾見
萬歲山頭翠華轉恨臣不及宣政初痛哭天涯觀畫圖
和劉美中尚書聽寶月彈桃源春曉

何年鑿源開混茫桃花兩岸吹紅香煙消遠浦生微陽
漁舟誤行溪水長溪迴岸轉山隙光疑有絳闕仙人房
居民爭出羅酒漿花閒笑語音琅琅抱琴釋子眉髮蒼

響泉韻磬鳴長廊能彈往事悲孟嘗昔時臺沼今耕桑
又如勇士赴敵場坐令遊子思故鄉清猿抱木號鴻荒
孤吟劃見丹氣翔曲終待月西南廂重調十指初不忙
如見古畫秦衣裳春天百鳥爭頡頏桃源歸來今已忘
彈到落花空斷腸

送胡邦衡赴新州貶所

囊封初上九重闕是日清都虎豹閒百辟動容觀奏牘
幾人回首媿朝班名高北斗星辰上身墮南州瘴海間

不待他年公議出漢廷行召賈生還

大廈元非一木支身將獨力挂傾危癡兒不了公家事
男子要為天下奇當日姦諛皆膽落平生忠義只心知
端能飽喫新州飯在處江山足護持

娛書堂詩話胡忠簡以言事忤檜謫嶺外王廬
溪送以詩為邑人歐陽識告訐竄辰州檜死而
還

題辰州壁

辰州更在武陵西每望長安信息希二十年興措紳禍

一終朝失相公威外人初說哥奴病遠道俄傳逐客歸
當日弄權誰敢指如今憶得姓依稀

程史王盧溪在夜郎郡守承望風旨待以囚隸
檜死郵筒至張燕公堂以待之盧溪既得自便
之命題詩壁間蓋志喜也

初至行在

望中樓閣入青冥疑是長安舊帝京十里荷花開世界
幾年羈旅憶神京老隨丹詔身猶健夢入華胥眼尚生
行盡沙河塘上路夜深燈火識昇平

以上盧溪集

夜蛾兒

碧眼銀鬚粉撲衣又隨雪柳趁燈輝怕寒還戀南華夢

凝佇釵頭未肯飛

前賢小集拾遺

滕茂實

茂實字秀穎杭州臨安人政和八年進士初名
裸徽宗賜改焉靖康初以工部員外假侍郎使
金見畱終身布衣稱宋使者歿于雁門其友董
說錄其哀辭來獻詔宣付史館裒錄之紹興二

年贈龍圖閣直學士謚忠節

茂實奉使無狀不復返父母之邦所當從其主以
全臣節或怒而與之死幸以所仗旛裹其屍及以
所篆九字刊之石埋之臺山寺下不必封樹蓋昔
年病中嘗夢遊清涼境界覺而病愈恐亦前緣今
預作哀辭幾于不達方之淵明則不可若蘓屬國
牧羊海上而五言之作始敢援此例云

齋鹽老書生繆作王都官索米了無補從事敢辭難殊

鄰復盟好仗節來榆關城守久不下川途望漫漫儉輩
果不惜一往何當還牧羊困蘓武假道拘張騫流離念
窘束坐閱四序遷同來悉已歸我獨留塞垣形影自相
弔國破家亦殘呼天竟不聞痛甚傷肺肝相逢老兄弟
悼歎安得歡波瀾卷大厦一木難求安就不違我心渠
不汙我顏昔燕破齊王羣臣望風奔王蠋獨守節齊人
有甘言經首自絕脰感慨今昔聞未嘗食齊祿徒以老
為民況我祿數世一死何足論遠或歿江海近或死朝

昏歛我不須衣裹屍以黃襠題作宋臣墓篆字當深刊
我室年尚少兒女皆童頑四海無置錐飄流倍悲酸誰
當給衣食使不死飢寒歲時一酹我猶足慰我魂我魂
亦悠悠異鄉寄沈冤他時風雨夜草木號空山

齊東野語茂實與路允迪樞密宋彥通翰林修
撰奉使金國割三鎮太原尋奉密詔據城不下
金人怒之囚于雲中淵聖北遷茂實冠裳迎謁
拜伏號泣請侍舊主俱行不從且誘之曰國破
主遷所以留公者蓋將大用遂留之雁門放允
迪彥通南歸先是自分必死遂囑友人董誥以
奉使黃襠裹屍而葬且大書九篆字云宋使者
東陽滕茂實墓復作詩自序云云後竟以憂憤

成疾殂北人哀其忠為之起墓雁門山歲時致祭焉後董誥自拔南歸上所為詩贈直龍圖閣國史甚畧予訪之北方紀錄得其實焉

天寧節有感

節臨重十慶天寧古殿焚香祝帝齡身在北方金佛剎
眼看南極老人星千官花覆常陪燕萬里雲遙阻在庭
松柏滿山聊獻壽小臣孤操亦青青

汴梁故老云徽宗本以五月五日生

以俗忌移之十月十日故此詩有重十之句

偶成

纖雲卷盡見秋容
古木交陰一掃空
雪壓羣山曉來雨
葉青缺斲幾番風
欲歸未得人將老
屢送還來鬼亦窮
賴得子卿佳傳在
整冠時讀慰飄蓬

哀隆德守臣張確確浮休張舜民弟嘗為烏延帥
幕獨不廷謁童貫詩弔之

睢陽萬古一張巡
忠義傳家有世臣
顏子伏膺當入室
潘郎望拜肯同塵
圍城抱恨天猶晦
仗劍臨危氣益振
歎子鄰邦盡曹李
偷生端作九泉人

以上中州集

宋之才

之才字廷佐瑞安人政和八年上舍出身高宗朝為考功員外郎

隆山院

危嶺盤雲杪驚濤漲晚空江山端有待杖屨偶相同孤塔蒼茫外千帆杳靄中誰知立壑趣未縛輓塵紅

東甌詩集

朱松

松字喬年徽州婺源人政和八年同上舍出身

南渡歷司勳員外郎出知饒州主管台州崇道
觀有韋齋集

新筍

春風吹起籜龍兒戢戢滿山人未知急喚蒼頭斲烟雨
明朝吹作碧參差

曾端伯百家詩選朱吏部喬年儒學決科刻苦
為詩紹興初綦處厚為翰林學士每哦其詩最
愛此絕蓋前人有筍詩曰急忙喫著不可遲一
夜南風變成竹喬年黜化乃爾精巧處厚力薦
于朝後為尚書郎

春晚書懷

萬里西遊為覓詩錦城更付一官癡
脫巾漉酒從人笑拄笏看山頗自奇
疎雨池塘魚避釣曉鶯窗戶客爭棋
老來怕與春為別醉過殘紅滿地時

曉過吳縣

舟行有嚴程越國常曉發雙櫓兀殘夢
起坐窺落月人家岸野水霧雨籠邃閣
遙憐瑣窗人敲枕聽鴉軋

坐睡

坐久睡屢兀手失未了書清風脫然至心醒得我娛起
看孤隙光了不移錨銖云何短夢中萬境生須臾嗟彼
市朝子百巧營其軀安知非夢境過眼滅無餘

以上韋
齊集

朱 棹

棹字逢年韋齋之弟有玉瀾集

三山次潘靜之升書記韻

客路那知歲月長掀眉一笑茝芻房且傾徐邈聖賢酒
不問陳登上下牀雲影翻空迷海嶠秋聲隨夢到家鄉

明朝各聽船窗雨猶憶枯碁戰四郎

大食餅

竊質謝天巧風輪出鬼謀入窯奔關伯隨舶震陽侯獨
鳥藏身穩雙虹繞腹流可充王會賦漆簡寫成周

六月二十日

次日立秋

天涯明日見秋風錯莫誰驚覆井桐豈意楚山招隱處
盡歸蜀客廣騷中釣魚偶爾針偏直乞米茫然帖自工
獨卧南軒聽南澗蠻花猶作杜鵑紅

以上玉瀾集

張叔夜

叔夜字耒仲開封人侍中耆孫以蔭補官召試
制誥賜進士出身累擢中書舍人遷給事中出
知海青二州歷簽書樞密院事靖康殉難贈開
府儀同三司諡忠文

岐王宮侍兒出家

六尺輕羅染麝塵金蓮步穩襯湘裙從今不入襄王夢
剪盡巫山一朵雲

竹坡詩話樞密張公嵇仲喜談兵論邊事面目極嚴冷而作小詩有風味

謝舉廉

舉廉字民師新喻人政和閒以進士知南康受知東坡有藍溪集

獨醒雜志東坡嶺南歸民師袖書及舊作遮謁東坡覽之大見稱賞謂民師曰子之文如上等紫磨金須還子十七貫五百遂留語終日民師著述極多今其族摘坡語名上金集蓋其一也

戲題指紋鬪牛圖

左者前其角右者後其足浼君雙指螺戰此兩觥觥草

長水遠日悠悠不向桑閒自在休
蝸頭尚可屠蠻觸壁
上從今關二牛

聲畫集

西捷口號

聖明陛下如先帝闢國謀臣似召公
不遣毛嬙嬪漠北
只將魏尚守雲中
百年境土逡巡復
萬里窠巢指顧空

今日版圖非昔日
玉關西有嶺名蔥

茗溪漢隱叢話

句

萬里一時開驥足
百年今始破天荒

獨醒雜誌江西自國初以來士人未有以狀元及第者紹聖四年何忠孺昌言始以對策居第一里人傳為盛事故謝民師有詩寄忠孺云云蓋記時人之語也

尹 焞

焞字彥明洛人子漸之孫少從伊川學舉進士策問欲誅元祐黨籍不對而出遂罷舉靖康中賜號和靖處士南渡初以薦入經筵擢徽猷閣待制有集

自秦入蜀道中作

南枝北枝春事休啼鶯乳燕也含愁朝來回首頻惆悵
身過秦川最盡頭

和靖先生集

喻汝礪

汝礪字廸孺蜀之仁壽人第進士靖康中官祠
部員外郎金人議立偽楚汝礪不為屈遂歸隱
于邛山之陽自號捫膝先生有捫膝橐

困學紀聞後魏葛榮陷冀州賈景興稱疾不拜
每捫其膝曰吾不負汝偽楚之僭喻汝礪捫其
膝曰此豈易屈者哉以捫膝自號蓋本于此

謁江濱廟

坤軸東南傾大江日夜注前驅下洛洙餘濤畧吳楚任
勢不期勞得意隨所遇水也初無營神哉亮誰主芳蘭
沈清華碧藻舒翠縷晨鵲戲野岸春鳬集深渚均是得
所安而神豈私汝古來幾精魄拾此迷所處滛遊不知
還沙村失烟樹而我後千載悠然在江許抱甯貴無競
矜名忌多取冥冥罨岸風滛滛打船雨舞雪窺洪濤開
蘋渡前浦再拜謝神貺聊復隨所住

遊海雲山

渺渺天宇初便復有此山清晨及茲遊遐想百代前來
者幾何人當時各為歡淑質揚妙舞哀絲遞清彈樂事
坐如昨芳歲已屢殫向來所遊人落葉不復還迴然散
遠目感之為長歎竹林遙舊所鵲巢豈昔眠念誰當久
存而不住所緣破涕聊一怡山川卻婁妍未知後世事
誰復當來旋

清曉坐四天王院

杳杳天宇涼月墜星亦稀朝暉下檐隙遠色開林扉寂
坐無物役隱几或在斯曠焉耳目清擬覺形神歸溷世
跡若近抱沖心獨微故殿經幾年何人所摹規當時亦
姱哉作者良已罷快意取一好于身亮何私不知壯觀
地徒使來者悲坐頃又成昔安知今是非

遊西臺院暑雪軒觀石鏡

城中苦伊鬱茲軒獨高褰連甍動參差錯畦橫阡眠雪
嶠正孤峙若與我周旋遠翠浮蕩漾輕鷗下聯軒密竹

胃幽逕新蒲澹清漣初遊愜餘懷既久幽念攢慨彼泉
下人灼灼夸令顏忽焉墜榛莽窈窕不可援一鏡空復
情況乃塊石頑哀哉彼愚子婉孌情所牽差勝茂陵公
更詠方士言

謁諸葛廟

孤雲何其高明月不可繫灼灼抱此心與世自涇渭釋
耒從所歡感亂亦歔歔咨惟今之人竊國未云耻七首
入吳市秋風動燕水區區袁與曹等是刺客耳而我于

其間秉義不敢墜哀音回衝飈清義動幽邃天心固難
亮吾獨信所履溶溶日間雲漠漠苔點砌飢飈墜蒼瓦
澹薄公所憩靜然想英姿孤懷亦差慰

遊琴臺

臯朔語類俳上頗倡優之嚴吾數預事慘懔失所棲慨
彼猜忌姿公卿命如絲夫子迺謁問

關五字

眷言

彼姝子深情結幽期浩露泛酒甕輕雲思琴徽撫絃視
八荒頗覺秦岫低紛紛漢諸子悟解良獨遲一朝不自

保頸血霑裳衣公豈不炯介慮禍蓋已微汚已迴前識
達生邁天倪闊哉昭曠情豈屑後代嗤

子雲墨池

讀書豈不好憂憤還自茲書中見古人隱閔惻餘思遇
險理有激尋分意多隨娟娟感姱容感感念幽棲曾是
無閒然孰焉愜所宜覽之不自聊悵然起遙悲不如撥
置之濁酒聊一持先生頗多事斯心昧前知亦復坐奇
字慘戚亡所歸

晚泛浣花遂宿草堂

扣撓泛澄虛濯流睇幽芳晚霏襯竒樹夕霏媚疎篁歸
鳥亦暫閒夜魄動初涼忽焉衆星微天高月舒光昔也
杜陵子澹然此茅堂客至酒自斟句得意已忘云何嘗
念飢零落在道旁古來技入神一飯豈所望吾輩天所
窮慨歌淚霑裳

草堂詩

燦燦詩翁錦里西只緣詩好合窮棲竹鋪冷色雲連寺

柳漾晴絲鳥過溪凝怨不禁闌樹暗駐情應恨蜀山低
離人苦怕春歸盡可忍紅英半著泥

亂後飄零歇此身風光無賴更清新客懷易感酒添病
詩思苦慳花減春南枝北枝鶯舌巧前村後村雨腳勻
暫借溪邊老為客花心柳眼莫撩人

上席帥

先公御史如御兵迎刃而解如庖丁掀髯一笑黠吏走
蜀中草木知威名伯兄渠渠天下士嵩高少室之英靈

妙齡提書陳閫闔竝議可以諧韶諤昨年兩作益州牧
西南惡少不敢行後來繼者有季弟潭潭大度涵滄溟
指麾萬事不介意決皆雨電風烟生南望峨嵋西玉壘
逸氣夜與銀河傾幅巾筇杖過何許閒邀仲元訪君平
小童蓬葆夜吹笙往往笑倒長庚星拔劍起舞者誰子
杜陵老翁醉不醒坐中入眼無俗物胡為見我眼自青
武侯廟前有古柏風吟雨獻蛟龍聲我來正欲剗爾腹
琢作巨屋丹其楹琢作巨室丹其楹繪此落落三名卿

尚使千載知儀型喻子作詩如鼎銘

以上成都文類

題周昉美人拜月圖

東風元是無消息獨捲珠簾望春色風驚紅葉墮珊珊
夢斷行雲泣殘月悵悵柔情不自持此心端被月先知
窺窗入戶如相伴應是嬌娥慣別離

聲畫集

傅察

察字公晦孟州濟源人堯俞從孫舉進士歷吏
部員外郎宣和七年使金見幹喇布不拜死之

贈徽猷閣待制諡忠肅有集

次申教授直宿

皎皎虛堂帶月清
金風入律露華明
潘郎寓直生秋興
韓子長歌憶短檠
驚鵲繞枝巢未穩
幽蟲臨砌隱餘聲
卻嫌詩思掩歸夢
數盡高城長短更

李良龍示牡丹長句謹賦

一見奇葩潑眼明
兩川風物寄爭新
十家京洛供長日
萬朶東秦照暮春
諦視尚疑傾國女
醉吟猶似謫仙人

定知不是無情物為有真香暗度頻

僕家近洛而常官
青社故云以上

傅忠肅集

王仲疑一作疑

仲疑字豐父丞相珪少子政和中守會稽後擢

待制建炎初知袁州金人入江西坐失守削籍

時秦檜當國為其兄仲山壻啟懇開陳詔復元

官

句

白髮衰天癸丹砂養地丁
老境得為丘壑伴醉鄉還

勝子孫扶

詠杖

許彥周詩話

朱載上

載上舒州人官黃州教授翌之父

句

官閒無一事胡蝶上堦飛

者舊續聞東坡居黃州客有誦朱公之詩云云
東坡稱賞再三遂為知己

朱翌

翌字新仲舒州人號灊山居士政和間進士南
渡後寓家桐廬為中書舍人忤時宰謫曲江晚
召還卜居鄞自號省事老人有集

揮麈後錄朱新仲仕江寧在王彥昭幕中有代
彥昭春日畱客致語云寒食止數日間才晴又
雨牡丹蓋數十種欲折還芳皆魯公帖與牡丹
譜中全語也彥昭好令人歌柳三變樂府新聲
又嘗作樂語曰正好歡娛歌葉樹數聲啼鳥不
妨沈醉拚畫堂一枕春醒又皆柳詞中語

題顏魯公像

千五百年如烈日二十四州惟一人朝衣視坎趨前死

羽服行山即此身

後村詩話

示同會

無奈春寒老不禁
喜看晴日上窗櫺
羣花半露乾坤巧
百刻平分晝夜停
拄杖有時挑菜甲
桔槔無復問畦丁
逢春不出何為者
衆醉誰知可獨醒

瀛奎律髓

競秀閣

輞川遙展右丞圖
盤谷中藏李愿居
龍睡潭深飛客櫂
鳳鳴枝老結吾廬
但令蠟屐去前齒
安用鷗夷託後車

西望子陵三十里烟雲來往問何如嚴州府志

句

天氣未佳宜且住風波如此欲安之

送汪彥章南遷
耆舊續聞

三

徑誰從陶靖節重陽惟有傳延年

本草菊一名傳延年
困學紀聞

經年不濯子春足半月纔梳叔夜頭

軒嬾

此時老子興不

淺旦日將軍幸早臨

招郭侯飲

何以報之青玉案我姑酌

彼黃金壘

以上後村詩話

王庭秀

庭秀字彥穎明州鄞人登政和上舍第建炎中
御史臺檢法官直祕閣主管崇道觀有磨衲集
同舍弟泛舟西湖登畫錦堂步至紫翠亭望嬾堂
景物懷故龍圖舒先生

城中十頃湖雲水相演漾春風破冰谷拍岸新流漲平
鋪鴨頭綠澹沲蒲萄釀朱薨媚孤嶼梵宇麗相向萬瓦
生清暉千花聯錦帳晨曦照炯炯芳氣浮泱泱日暮姿
態妍烟霞渺空曠誰將水仙境聊借詩人仗臥護五年

城追懷老詩將微吟示清野麇戰得閒放變化無端倪
虛無落名狀坐令湖上景勝絕神宇王當時經行地藻
麗隨屨杖斯人今則亡物色亦摧喪他年牛馬走曾拜
丈人行塵埃久飄泊歲月成漫浪問訊嬾堂君松竹忻
無恙尚意壁間聲持麇朱絲唱撫事重興嗟陳迹徒悵
望哦公十洲詩風月為悽愴

延祐四明志

朱筠

筠字仲端青田人政和中由上庠特奏名除蘄

春監有竹軒小集

和郡守劉巨濟重開石門洞

謝公箕穎流特擬耽幽棲
蠟屐得洞天雙鶴頻清溪
擬追玄圃遊對此為階基
披榛剪蘿蒿宿霧暝欲迷
方當誇高標焉能分徑蹊
鬼物諒奪氣幽禽亦驚啼
卓哉曠世懷心與境不攜
俯視囂塵中榮枯猶稗荑
孰知東海偏秦鞭預排驅
付與破荒手從此凌丹梯

括蒼彙紀

楊友夔

友夔字舜韶吳郡人

盜發孫堅墓作

闔廬城南荒古丘昔誰葬者孫豫州久無過客為下馬
時有牧童來放牛居然珍寶出光怪識者夜見蹤其由
玉環金盃到塵市土花不蝕餘千秋州家廉問亟封守
賊曹掩骼窮姦偷已知其中有可欲亦恐未免無窮憂
當時義師奮四海少日已無袁與劉英雄異世凜如在
暴露無乃為神羞人生浮脆那可料螻蟻烏鳶從所求

高陵勸爾一杯酒自古南山能錮不

吳郡志吳孫王墓在盤門外三里政和間村民發墓輒皆作篆隸為萬歲永藏之文有東西銀杯初若燦花良久化為腐土又得金搔頭數十枚父老相傳云長沙王墓王即孫策郡人楊友夔為詩直指以為孫堅有高陵之句按史堅自塋曲阿紹熙辛亥郡人舉賢良方正滕寔以史考之定為孫策所塋與世俗長沙王之說稍合

何鑄

鑄字伯壽餘杭人政和五年進士紹興中官御

史中丞

龐祐甫卜居白蘋洲走筆寄感

君愛白蘋洲，攜家面碧流。
皇程惟百里，宦跡只扁舟。
過盡江淮地，何如宛洛游。
行宮催種柳，禾黍滿神州。

吳興藝文

補



宋詩紀事卷三十九